

Meruul ra Melemalt el Tekoi ra Ungil Taem, el Diak Dongiil

Mlara Elder Jose L. Alonso

Ra Seventy

Chelechal taem ete betook el chad a kiei ra chelsel a klengit el reng ma rrauereng. Ng diak el betik a nger ra kerrir e diak el sebecherir el kudmokl a usbechellir. A rebebil a mla mo diak sel deourenge lobang. A reporfet a mla melekoi el kmo a meral deourenge a debetik er ngii sel doltirakl okesiu ma osisheklele a Kristo. Ngii Osobeled, Ngii a Sensei er kid, e Ngii a melemalt el Okesiu.

A klengar Ngii a mle mui ra omesiou. Sel dosiou ra retonari er kid e kede olngeseu ra rekosekodel. Chelsel tiaikid el teletael eng locha sebeched el metik a nger ra ikel ringel el dolab. Me sel doltirakl okesiul Osobel e kede ochotii a beltkil a rengud el mora Demad ra Babeluades ma Ngelekel Sechal, el Jesus Kristo, e merael mo uaia Tir.

A King Benjamin a millekoi el kirel a belkul a omseiou, el kmo sel sekum e kede “mesiou el kirel a ngii dil chad e kau a merang el mesiou ra Dios.” ¹ A bek el chad a ngarnгии a techellel el mesiou e olecholt ra beltik el reng.

A President Thomas S. Monson a mla olengit er kid el “mora siik” e mesiou ra rebebil. Ng dilul kmo: “Kede mo metik el kmo tirkel dosiou er tir, el mla melchesuar okesiu ra Mastang lokiu a urered, a diak el sal sebecherir el smodii aikel ngii a mengodech ra klengar tir. Ngarnгии a blak el reng el mo ngara omesiou, el mo obang ngariou el reng, e mo kiei el uaia Osobel. Me sel lenguu a chedaol klemedengei ma teletelele a yaksok ra diak a ulebengelele, ete mo melekoi osisiu el tekoi el uaia ngkel cheuikou el chad el Osobel a ulutii osengel, el dilul kmo, “A tal tekoi el kudengelii a kmo, ak, mle cheuiko, e chelechang ea kumes.” ²

Bek el sils e ngarnгии a techellel el olngeseu e mesiou---el meruul a melemalt el tekoi, ra ungil taem, el diak dongiil. Momdasou er tirkel betook el chad el meringel el osiik a ureor malechub ete smecher, ma resabisi, el dirrek el omdasou el kmo ng dikeang rokui er tir. Ngera sebechem el rullii el olngeseu? Ka momdasou oleko tonari er kau a mengarachull el mla metemall a mlil, e omekedong er kau lousbech a ngesou. Ngera melemalt el tekoi el mrelii el morngii? E oingerang a ungil taem el bo mngesuir?

Ak lotkii a tara taem el ki murrael el telungalk el mora chelsel a beluu ra Mexico City el mo omechar a bilir tirkal terung el ngelekam. Te kmal mle mekekerei. Ngkal klou el ngelekam el sechal dirk mlo erung a rekil, ea kekerei el sechal a tang a rekil. Tial rael a mle mesekele ra rechad. Tia ra ki morael lomechar a klalou, el urrekodel chimorir a rengelekam, ea ki mlo dechor e omes ra kmo ngerang, e dimlak ki molchesuar el kmo,

ngkal klou el ngelekam el sechal a dibus! Ng diak ki modengei el kmo ngera dilubech, eng di ngikal ngelekam a mle dibus. Meng dimlak ki mongii, e rirurt el mo osiik er ngii. Aki ulsiik e oleker ra ngklel, el suebek a rengmam, el omdasou el kmo ng locha diak kimluut el mesang. Chelsel a uldesuam ea ki ulelengit ra Chedam ra Babeluades me lengesukemam.

Ng di mle telkib ea ki metik er ngii. Ng dilechor, el lomes aikal omotzia el diak lodengei el kmo ngera ngarngii. A bechik me ngak a milchulii e melungel ra medal, e tilbir el mo blak a rengmam lomes ra rengelekam meng diak el luut el remiid. Aki silubii el kmo a teletael el mora siik el kirel a ngelekam, a dimlak ki mousbech ra kora ngara miting el kirel. Aki di mlora siik, el tilobed el merael losiik er ngikel chimong el mla remiid. Aki dirrek el mlo medengei el kmo ngikal ngelekam a dimlak lodengei el kmo ng mla remiid.

Rodam ma rodos, te locha betook, el diak a ungil uchul, a mla remiid ra osenged e diak lodengei el kmo tem la remiid. Alsekum e kede mengiil eng sebeched el dimerekong el metom er tir.

Me tirkel betook el ousbech a ngesou er kid, eng diak a kmal belkul doruul a beches el prokuram malechub e dosaod a teletael el meringel a doruul. Tir a di ousbech ra blak el reng er kid el mesiou---- el meruul a mele malt el teletael ra ungil taem, el diak dongiil.

A Osobel ra bol dum ra rechad ra Babier ra Mormon, e Ngii a milskid a ungil okesiu el kirel a diak dongiil el mo olngeseu er tirkel mla remiid a deourengr ra rengrir. Ma osisheklel el mora rechad, e Ngii a mlo metik el kmo ng mle meringel er tir el mo medengei a rokui el Tekingel. Ng dilu er tir me bol rei e lolbedebek aikal tekoi el Ngii a mla kmung er tir. Ngii a ulelengit er tir me loluluuch el mora Chedam ele kedmekelterir el muut el me ra bol kukuk, el Ngii a lmuut el mo olisechakl er tir. [3](#)

A mocha ra ulebongel ra osishekel e Ngii a ulemes er tial seked e milsterir el lemangel, el eng mle sorir Ngii a lluut el kiei lobengterir:

“Meng dulang er tir: a Klechubechub er ngak a mla mo mui el kiriu.

“Ngarngii a resmecher ra delongeliu?Mngiteterir el mei. Te ngarngii a rechitechut, ma lechub ete mikou, malechub ete tiuach, malechub ete sechudel, malechub ete chebedes, malechub ete chelisemsum, malechu e tirkel mechad, malechub ete chuarm ra ngii dil ngerang? Mngititerir el mei me bo kumekungil er tir, eleng mekenge renguk er kemiu; a blil a klechubechub ra renguk a mla mo mui.” [4](#)

Me te ngiltiterir a resmecher er tir el mor Ngii, me Ngii a ulemekungil er tir. E tir el rokui a mlo er iou er ochil e mengull er Ngii e melungel Ochil, “me tial ildois a dim lo

melungel ochil, e mlo melecholb ochil lolab a iuechel a mederir.” E Ngii a dulang el kmo a remekereki el ngelekir lemei, e Ngii a ulemekngeltengat ra derstang er tir. Tiaikid okesiu el Osobel a mla meskid. A beltik el reng er ngii a mora rokui, eng di Ngii a diak lobes ra chimong. ⁵

Ak medengei el kmo a Demad ra Babeluades a oubeltik el reng, e ungil medengei, e klou a rengul. A Ngelekel Sechal, el Jesus Kristo, meng uaisei, el betik a rengul er kid. Te meskid a ngesou el dousbech loku a reprofet er Tir. Ak mla mo medengei el kmo ng klou el selbechakl a dengarnгии sel doltirakl ra reprofet. “A siik” a dirk melemolem, a President Monson a millekoi: “A Rubak a soal a domdasou. Ngii a soal a doruul. Ngii a soal a urered. Ngii a soal a olchotel a klaumerang er kid. Ngii a mengerechir ra blak el reng er kid.” ⁶

Ngarngii a ngercheled e klou a techelled. Te betook a ousbech el lemuut el mo oremii sel ungil deourenг loku a Ikelesia. Tiaikid el deourenг a mei loku a ngeiul a chedaol ruoll, meruul a chedaol telbiil, e oltirakl. A Rubak ousbech er kid el mo olngeseu. Mei e doruul a melemalt el tekoi ra ungil taem, el diak dongiil.

A kuchais el kmo a Dios a ngar e Demad. A Jesus Kristo a ngar e mla meskid a klengar re Ngii me bol sebeched el muut el mora rengedel a Demad ra Babeluades. Ak medengei el kmo Ngii a Osobeled. Ak medengei el kmo sel chimol blekokeuui er Tir a melemolem lolecholt er ngii. A kuuchais el kmo a President Thomas S. Monson a profet er Tir e tiang a di chimong el meral Ikelesia el ngara bebul a beluulechad. Ak medengei el kmo a Profet Joseph Smith a profet er tial Oluut. A kuuchais el kmo a Babier ra Mormon a tekingel a Dios. Ng mekrolid e meketeklii a rael el doltirakl er ngii meng mo sebeched el mo uaia Dios ma Betik ra Rengul el Ngelekel. Aikang a kdung el ngara ngklel a Rubak el Jesus Kristo, amen.

Uleklatk

1. Mosiah 2:17.
2. Thomas S. Monson, “Mora Siik,” *Liahona*, July 2001, 57, 58; *Ensign*, May 2001, 48, 49.
3. Mesa 3 Nephi 17:1–3.
4. 3 Nephi 17:6–7; dirrek el mesa bades 5.
5. 3 Nephi 17:10; dirrek el mes a bades 9, 11–12, 21.
6. Thomas S. Monson, *Liahona*, July 2001, 58; *Ensign*, May 2001, 49.

Omellach el mora Rengeasek

Mlara President Boyd K. Packer

Merredel ra Chelechad ra Teruich ma Terung el Apostol

Ak blechoel mengedecheduch el mora rengineasek, el mengaisisiu ra klengasek er ngak me kemiu.

Kom kmal mekreos el diak a mengaisisiu er kemiu. Ak mla mesekemiu ra betok el beluu ra beluulechad. Kom lemuut el ungil er sera le temam. Ng betok omodengei el kirel ebangelio. Ko meklou el chad e mesisiich a klaumerang er kemiu.

Chelechang okai ma euid a rekik. Kom locha melbedebek el kmo meng ngera sebechek el kudmeklii ra klengar re kemiu. Ak mla ngar sel mngarngii e medengei el kmo ko merael bedul ker. Eng di kemiu a dirkak bor sel kngarngii. A kmung a sesei el bades ra tal cheldechaduch:

A udelang el charm a merolang el mo soro.

Ea ngeasek el charm a diak.

Ngera ikel diak lodengei a ngeasek el charm

A udelang el charm a medengei a betok.

Meng medengei, ngikal uodel el charm

El dirk medengei a betok ra ngeasek el charm.

Me ngera diak lodengei ngikal uodel el charm?

---Ng diak el sebechel mereched el suebek.

A ngeasek el charm a suebek er bab, me iou,

E meliuekl er ngikal soro e uodel el charm.

E ngera diak lodengeli ngikal mereched e ngeasek el charm?

---Ng diak lodengei el kmo ng mor. 1

Ng dimlak loluches er ngii a Wordsworth, eng di ng klou a belkul!

Ma rokui el teletael ngara beluulechad, luldikul ra kekerei el belkul a ngarbab el llechul a kldung, e kemiu el ngeasek a mukeroul ra chelsel a basio ra cherarou.

Chelsel chedaol llechukl e kede medengei el kmo ng mlarngii a mekemad ra babeluades ea Lucifer a mlo omtok, e ngii, ma rechedal, a “tilobed el mei er tial beluulechad.” 2 Ngii a blak a rengul el melemall ra uldesuel a Chedam ra Babeluades e osiik el mo omtebechel a uldesued ma omerelled. Tial orrimel a chedaol, e ngii a di mekelkelii a beluuelchad. 3

Meng uaisei el ngarngii omtok, omelasem, ma ongetikaik, eng ding diak el kiriu el mo medakt.

Sera Iteruich ma euid a rekik. el tobedang ra high skuul el mle tang ra ungil ngalk ra skuul, e mle medengei el kmo, ngarngii a chelitechetuk, ea klengar kemam a mlengodech ra tal tutau ra Sandei. A bol kukuk ea ki mlokedong el mora auditorium ra skuul. A mlara bebul a tebel a kekerei el razio. A merredel ra skuul a urelii tial razio. Tiaikid ea ki rirngesii a ngerel a President Franklin Delano Roosevelt louchais el kmo a Pearl Harbor a blal debar. A Beluu ra Merikel a ngara mekemad lobengkel a Siabal.

Uriul e tial teletael a ulebelekel. El liluut a President Roosevelt, el ouchais el kmo a beluad a ngara mekemad lobengkel a Dois. A Ongerung el Mekemad a mla oberk ra beluulechad.

A klengar kemam a mlo diak desal medengelii. Ng dimlak ki modengei el kmo ngera mo duubech. Kede locha kiei el mo sebeched el mo bechiil e oungek?

Chelechal sils e ngarngii a mekemad ma oderngesel a mekemad ea beluulechad a ngara uldikel.⁴ Kemi, el ngeasek, a locha mo rrau a rengmiu e mo bekikl el kirel a klengar kemi. Ng soak el mellach e olisechakl er kemi, e meskemi a uleklatk el kirel a bebil ra tekoi el bo moruul ma diak moruul.

A moktek ra ebangelio a “klou el uldasou el kirel a deourreng.”⁵ A telungalk a moktek er tial uldasou. A telungalk a ultuil ra klikiid el usbechellel aikel klisiich el omeob a klengar el ngara bedengiu.

Chelsel “A Telungalk: Chais el mora Beluuelchad,” el ngii a ulekrael tekoi el lultebedii a First Presidency ma Chelehad ra Teruich ma Terung el Apostol, e kede silubii ruchei ra demechell el kmo “a rokui el chad---sechal ma redil---[a] ulebeob el uaia teletelel a Dios. A derstang er tir a mekreos el ngalk ra reng el sechal ma redil el ngelekel a chedam ma chedil ra babeluades, me a, leuaisei, ea derstang er tir a ngarngii chedaol teletelir ma blebelir. Sel klemedengei ra chad el kmo ng sechal malechub eng redil a klou a belkul e [milkedmokl ruchei ra demechell]....

“...Aki melemolem louchais el kmo a Dios a mla kmu el kmo sel chedaol klisiich el omeob a klengar a kirel di mekedmokl ra delongelel a sechal ma redil, el tir a ulterekokl el kaubuch.”⁶

Sel klou el kelebsengel a Lucifer ma rechedal a diak a techellir el mo nguu a bedengir ra tech.

A bebil ra ongetikaik el bom chebangel, el bebil er ngii aikel kmal oberraod, a uldimukl a bedengiu. Ng diak dil ngarngii a klisichiu el omeob a klengar ra beches el telcheroll, kom dirrek el ngarngii a lemeltiu el melilt.

A Profet Joseph Smith a ulsisechakl el kmo, “Rokui el klengar loba bedengir ra tech a ngarngii a mesisiich el klisichir er tirkel diak a bedengir ra tech.”⁷ Ma leuaisei ea rebek el chad el ngarngii a bedengir ra tech a lemuut el mesisiich a klisichir ra cherarou. Ke mora ringel ra ongetikaik el bedengem ra tech a uchul, eng di ngarngii a klisichem el mo mesisiich er ngii ma reanghel er ngii.

Ma kim tebedang ra high skuul, ete betok el kim dilak el ngara skuul a mlora mekemad, el bebil er tir a dimlak luut el mei. Ea rebebil er kemam a milengiil el mo soiseb ra klsoldau. Ng dimlak ki modengeli a tara klebesei er kemam. Ng locha diak ki mad er tial mekemad? Ng locha ngarngii a mo medechel ra ikel ki modengei sel kim luut?

Ma kmal mle ungil medengei el kmo ak mora klsoldau, mak siliseb ra air force. Ak dim le mereched el mora Santa Ana, California, el mora omesuib ra becall ra skoki.

Ng dimlak a kmal mesisiich el klaumerang er ngak ra ebangkelio el kmong klemerang, eng di a resensei er ngak ra seminary el , Abel S. Rich ma John P. Lillywhite, a mle medengei el kmo ng klemerang. Ak mla rongesterir louchais, e uluumerang er tir. A kulemdasou el kmo, “Ak di ultuil ra klaumerang er tir el di merekmo bol ngarngii a klauemrang er ngak.” Meng mle uaisei.

Ak mla remenges el kirel a patriarchal blessing eng ding dirkak nguu a chimong. Chelsel a bek el stake e ngarngii a patriarch el mechedaol lobang a reng ra ulaoch ma reng ra ocholt. Ngii a di chimong el chad el meskid a berrotel el klengeltengat el mor tirkel tir a lekengi a rebisop er tir. Ak milluches el mora bisop er ngak el kirel a kengi.

A J. Roland Sandstrom a milchedaol el patriarch el kiliei ra Santa Ana Stake. Ng dimlak a ngera lodengi el kirek ma dirkak a tal bla lesekak, engdi ng mileskak a klengeltengat. Chelsel tial klengeltengat eak miltik a nger ma kirek el meruul.

Meng uaisei el berrotel a patriarchal blessing, eng di msall e kuuchais er kemiu a di kedeb el bades er ngii: “Ke mo mukrael lokiu a ngerel Chedaol reng e mo muklatk el kirel a kengaol. Asekum e koltirakl aikal uleklatk, ea Demad ra Babeluades a mo omekngeltengat er kau meng mo sebechem el muut el mo obengterir a rebetik ra rengum.”⁸

Sel tekoi el *alsekum*, el kmal kekerei llechukl, a uaia blol klou a belkul el mei er ngak. Ak mo ngeltengat el muut el mo remei *alsekum* a kultirakl a llach e dirrek *alsekum* a kurrenges ra odbechel Chedaol Reng. Meng uaisei el tial sengk a blak nguu ra taem ra

techolb e chelid, eng ding dimlak bo kudengeli Chedaol Reng malechub a teletelel a urerel.

Ak miltik er sel mle kirek el mo medengeli el kirel odbechel a reng ra chesl a Babier ra Mormon. Ak chiliui el kmo a “reanghel a mengedecheduch loba klisichel Chedaol Reng; ma uchul, ete melekoi a tekingel a Kristo. Mi sei a uchul eak melekoi el kmo... Bo medinges ra tekingel a Kristo; ele, a tekingel a Kristo a mo olecholt er kau aikel rokui el kiriu el meruul.”⁹

A kumdasou e sel chimol tekoi el ksilubii ra Babier ra Mormon a kmo a ngerel a Reng a mei el *domelchesiu* er ngii ng diak el ngor. Ke mo medengeli, el uaia ngak, el mo “orrenge er sel ngor el ngii *omomelchesiu* er ngii e bai diak *mrengeii*.

A Nephi a ulengeroel ra rucheel el kmo, “Kemiu a mla mesang a anghel, eng mla mengedecheduch er kemiu; oi, kom mla rongesii a lebebil ra taem; el mengelulau lekor kemiu el kekerei a ngerel, eng di kemiu a mla mo diak *molchesuar*, meng dikea el sebechemiu el mo *melchesiu* a tekingel.”¹⁰

Bebil ra rechad ra mondai a kmo aikang a diak el merang el bades ele kau *orrenge* a tekoi, ng diak *momelchesiu*. Eng di alsekum e ngarngii a klemedengei er kau ra chedaol cheldecheduch, eke medengei el kmo a kot el ungil omesodel a teletael a tekoi el *omelchesiu*.

A sengk ra Chedaol Reng, alsekum eke kongei, eng mo omekrael e omeheliu, e dirrek el sumechokl a blekerdelem. Ng chedaol ngor el mei ra bdelum el uldasou malechub eke omelchesiu er ngii ra chesl a rengum. A Profet Enos a kmul kmo a “ngerel a Rubak a mlei ra uldesuel.”¹¹ Ea Rubak a kmu ra Oliver Cowdery el kmo ng mo ouchais el mora uldesuel ma rengul, loku a Chedaol Reng, el ngii a bo lobang.¹²

Ng diak el belkul a kmo kom ngar tial klengar el diak bo mruul a chelbirukel, eng ding diak bom moruul a meklou el chelbirukel el diak a uleklatk ra Chedaol Reng lekor kau el kot. Tial yaksok a mora rokui el chedal a Ikelesia.

A rebebil a mo remuul a kmal meklou el mekngit, el oiit a llach ra ebangkelio. Tiaikid eng taem el kumeklatk er kemiu el kirel a Tngakireng, ouuchel el reng, ma mui el klausubes el mor sel ngii omluut el mo klikiid. A Rubak a mla kmu el kmo, “Sel bla douchel a rengud ra kngtid, eke de mousubes, ea Rubak a diak el luut el melbedebek a kngtid.”¹³

Alsekum ea cherarou a ngoikau loku a klengit, ea kumeklatk er kemiu el kmo morkedii sel kiis el mekngii a chesmerel a kelebus ra chesem. Ng sebechem el mo beches loku a tngakireng ra Osobel el Jesus Kristo.

Ng locha morngii a taem eke omdasou el kmo ng locha diak mkliid el mo suobel ele kau el mla ruebet re klengit, meklou ma mekekerei, e omdasou el kmo ke mla remiid. Tiang a *diak a tal* bol klemerang! Ng di tal ouchel reng a sebechel mkerur sel ngii a ringel. Eng di ouchel el reng a *sebechel* mkerur sel ringel, el diak el iior ra kmong ngerang.

Alsekum e ke kora meruul aikel ngii a diak el kirem el meruul, malechub eke teloi ra rechad el tir a mengurs er kau el mora chelbirukel, tiaikid a taem el moterkeklaui, e ousbech ra lemitem el melilt. Morrenge ra ngerel Chedaol Reng, e kau a diak bom rebet.

Mak lemuut el kmul kmo a rengeasek er chelechal sils a mukeroul ra basio ra cherarou el ngesonges aikel ngarbab el osisechakl ra kldung. Eng di ngak el mesiungel a Rubak, eak yaksok er kemiu el kmo ko mo ngara selbechakl e ucheliu ra odechelakl ra cherarou alsekum ko morrenge ra Chedaol Reng.

Bo mungil oubail; mngara omengull omongedecheduch; morrenge a ungil chelitakl. Mongeroid er kau ra rokui el tekoi ra deleboes ma ngii dil mekngit lomeruul. Bo mulserochel a klengar kau e bo mesisiich ra klaumerang. Aki mui el ousbech er kemiu, me ko mo ngmai ongaisreng el klengeltengat. A Chedam ra Babeluades a di blechoel lomes er kau.

A klisichel a klaumerang er ngak a mla mengodech er sel taem el ble kultuil ra klaumerang ra resensei er ngak ra seminary. Chelechal sils eak di ultuil ra rebebil el cheluodel a uchul ma dirrek el secher ra polio el kngiluu ra kekerei eng di diak kumededenger el kirel a chedaol tekoi. Ak mla mo oumerang, e medengei, aikel mekreos el klemerang ra ebangelio ma Osobel el Jesus Kristo.

Me ngak el tara tokubets el sioning er Ngii, ea kuuchais el kmo a mo ulebengelel tial mekemad el ulemuchel ruchei ra demechell a diak lak dodengeli. A Lucifer a mo make.

Kede milsaod a charm ruchei. Kemiu el ngeasek a diak a belkul el msebek el mong e mei, el diak modengeli a rael el ngar medemiu. Ngarnngii tirkel medengeli a rael. Ng klemerang el Rubak el Dios a diak a ngera el bo loruul, ng bai di ocholt aikel bertelel el mora remesiungel el profet. [14](#) A Rubak a kudmeklii a Iklesia er Ngii el ultuil ra osisechakl ma omellach.

Sel btelul a Ikelesia ete ngarnngii a reteruich ma teim el chad el mla moterekokl el profet, chad ra ues, ma ocholt. A derstang el chedal a First Presidency ma Teruich ma Terung el Apostol a olab aikel rokui el kiis ra priesthood el meklou a belkul kirel orretel a Ikelesia. Ngkel ngarbab el Apostol a Profet---el President Thomas S. Monson, el ngii a di chimol

chad el sebechel lolab aikel rokui el kiis.

A chedaol llechukl a ouchais el kmo a First Presidency ma Chelechad ra Teruich ma Terung a dmak el oureor ea uldasou longedmokl a kirel tabesul a kengei er ngii ra rebek el chad. Me tiaikid a teletael. Aki oumerang ra Rubak el mo omekrael ra rael e osiik el meruul aikel Ngii a soal. Aki medengei el kmo Ngii a mla oterkeklii a mesisiich el klaumerang er kemam, a derstang el chad ma rebek el chad.

Ng kiriu el mesuub el mo oumerang ra Rubak loba rengum el rokir; e diak multuil ra di klemedengei er kau. ¹⁵ Ng kiriru el mo ngara klemerang el mo iiliuekl ra resechelei el tir a sorir el mo uaia kemiu.

Bebil ra taem e kom locha mo mechetikaik el kuk mo omdasou a ngodech el uaia ngak er sera kngeasek: “Me ngultuil ra teletael er chelechal taem, ea beluulechad a mo nguemed. A ulebengelel a beluulechad a mei ruchei ra krekui aikel kirek el meruul.” Tiang a diak el merang! Ke bai omes el bedul uchei e meruul aikel ngii a llemalt---mo bechiil, morngii a telungalk er kau, mesterir a rengelekem ma rengelekir a rengelekem, ma locha rengelekir a rengelekir a rengelekem.

Alsekum e kom oltirakl aikal osisechakl, e ko mo ngara ucheliu ma selbechakl el teletael e kau a medengeliu loku a odbechel Chedaol Reng er sel kirem el morngii, “ele ngoeak a klisichel Chedaol Reng e kau a mo medengei a klemerang ra rokui el tekoi.” ¹⁶ Ak yaksok er kemiu el kmo ng mo uaisei.

Uleklatk

1. John Ciardi, “Fast and Slow,” *Fast and Slow* (1975), 1.
2. Ocholt 12:9; dirrek el mesa Doctrine and Covenants 76:25--26.
3. Doctrine and Covenants 52:14.
4. Doctrine and Covenants 45:26.
5. Alma 42:8.
6. “A Telungalk: Chais el mora Beluulechad,” *Liahona* ma *Ensign*, Nov. 2010, 129.
7. *Teachings of Presidents of the Church: Joseph Smith* (2007), 211.
8. Patriarchal blessing ra Boyd K. Packer, Jan. 15, 1944, 3.
9. 2 Nephi 32:3.
10. 1 Nephi 17:45; smisichii a belkul.
11. Enos 1:10.
12. Mesa Doctrine and Covenants 8:2.
13. Mesa Doctrine and Covenants 58:42.
14. Amos 3:7.
15. Proverbs 3:5.
16. Moroni 10:5.

Ke de mla Mucherangel el Rokui

Mlara Elder Jeffrey R. Holland

Ra Chelechad er a Teruich ma Terung el Apostol

Rodam, ng reng ra klodam, eng soak el di bleketakl el mengedecheduch er chelechal kesus. A uldimukl er tial bleketakl cheldechaduch a re mekekerei el sechal ra Aaronic Priesthood.

Sel dosaod er sel klebekelel a Kot el Ues ra Joseph Smith, ea lebebil e kede metengetii a demedakt er ngii el mekngit el dilubech el mlornngii ra uchei ra ues. Mekngit el dilubech el moktek a mo melemall er a kekerei el sechal a bol sebechel engdi ngbai mlo merrob er a ocholt el kirel merael mei. Ng diak dosaod ra cherarou, ker di mesaod er ngii alsekum meng kmal kired, ng diak el soak el mesaod er ngii, engdi a dilubech el tekoi el mora kekerei el Joseph a mekletkid er a ikel kirel a bek el chad, el molmuut ra rebek el mekekerei el sechal, el ngartial ongdibel el kirir el mo melbedebek.

A kot, a Diablong malechub eng Lucifer malechub eng Edam ra Blulak---sel soam omomekedong er ngii---a merang, ngii el rokir el olechotel a mekngit. A moktek er ngii ra rokui a di mekngit, e ngii omritel a leborngii a olsobel el llomes, er sel uldasou ra klemerang. Ongerung, ngii a kot lomtok er a diak a ulebengelel el beltik el reng ra Dios, Tngakireng ra Jesus Kristo, ma ureor ra budech ma osobel. Ng mo okeuad el kirel aikang ra ngii di leker el mor sel sebechel. Ng medengei el kmo ng mo mechitechut e mo mechoit ra ulebongel, eng di ngii a blak a rengul el melai ra rebetok el mo obengkel lokiu a tkur rebab el sebechel.

Me ngera bebil er a teletael lousbech a diablong er tial klausichai el melai er a diak a ulebengelel klengar? Sel teletael dilubech ra Sacred Grove a osisechekill. A Joseph a milluches ra rekord el kmo ngokiu a blak el reng el mo merrob aikel morngii, ea Diablong a milskak “a mechas a rengud er ngii el klisiichel er ngak el mlo somesemii churak mak mlo diak el sebechek el mengedecheduch.”¹

Diablong a diak el sebechel el melemalt el nguu a klengar. Tia chimong ra betok el tekoi el diak el sebechel rulii. Eng di a blak el reng er ngii el merrob ra ureor a mo uchul eng mo sebechel alsekum meng sebechel somesemii chural a roumerang. Rodam, alsekum tiang a teletael, ea kusiik er a mekekerei el chad ma meklou el oumerang er tial klakouad er a delongelel a ungil ma mekngit el me lmuches a ngklir e mengedecheduch. Kid a ngara mekemad, e chelechal mei el sesei el bung, eng soak el mo chimol chad el blil olsiseb ra rechad.

Ngak a kuusbech el mengitakl ra “Kid El Rokui El Mla Soiseb”? Ke medengei, sel ngara

chelitakl el kirel a “A ki mengiil er a resoldau; ng techa mo olngeseu?”² Adang, a ungil er tiang el okedong el mo oumekemad a diak kim molai er a rolngeseu el mo omoes a boes malechub e tometech a dub. Ngdiak, ng soad a resoldau el mo ngmai a dongu ra mekemad a “rokui el tekoi el tuobed er a ngerel a Dios.”³ Ma kusiik er a remisionari er chelechal kebesengei el diak el dil tir el llemechet a churir te bai mong, el oba Reng ra Rubak ma klisiich ra priesthood, el mok a ngerir e melekoi ongasireng. A ua tiang el cheldecheduch, el tirkal rodam ra uchelel a millekoi, a mo okiu a klaumerang “ea meklou el ureor a mla meruul, e mo meruul.”⁴

Ng kmal soak lolengit ra remekekerei el sechal ra Aaronic Priesthood el mo ungil dengchokl el mele malt e lomtab. A morkemiu, eak mo meskemiu a cheldecheduch ra klekool. Tiang a a klengar-ma-kodall el klausichai el kid omtok ra erarou el chetil kau e chetil tial ureor, mechelechang eak mo telkib el ngar medam, isnged el mora isnged, e lobengkel a ungil a idisel ngau ra tekingek el mo durur a telkib el engedel a medam---el ua loruul a coach sel sekum a teng a kaiuekeed ea mo kats a ngmai a rokui. Ma klekool a ngarngii ea lolekoi er ngii a coach lekor kau a kmo, a obo mousekool er tial klekool, ea bebil er kemiu a kirir el muut el mo klikiid er chelechal om ngartiang. Ngar tial klakeuad ra delongelel a ungil ma mekngit, eng diak el sebechem lousekool el mora cherrarou sel bek el taem el lemei ongetikaik, e momdasu el kuk oubail e mora Osobel ra templo ma mision el oleko ngdimlak a ngera el duubech. Tiang, e mekekerei el sechelik, a diak el sebechem el rulii. A Dios a diak el bol motuub.

Me tiakid a meringel tekoi, er kau me ngak. Ngarngii a betok el dart el telael el Aaronic Priesthood---a rekrir a memekerei el sechal el ngara rekord ra Ikelesia el mekdebechii tial chelechal el sebechir el mo mesiou el misionari. Eng di a meringel el soadel er ngii a kirir a re deacon, resensei, ma re priest el di blechoel el mo mesisiich e klikiid mel bol moterkokl el elders e mesiou el misionari. Meke de ousbech ra remekerei el sechal el di mla ngartial chelechal mel *medechel* ngarngii e merkom terob aikal di omduu el tuobed ra kerbai mesel dousbech er kau el mousekool e msiseb el blak a rengum el ousekool! Meng ngara betok el klausichai ra klekool, el kudengei eng ngarngii a kerbai el lluches el ngara ulaod malechub eng chutem el kirel a rokui el ousekool el ousichai ra chelsel, e ungil le Rubak a mla lmuches a kerbai er a klikiid el mortirkel mokedong el mo oureor lobengkel er tial ureor. Ng diak a tal missionari el meringel el mo ouchel a kngtil ra sius malechub eng deleboes lomeruul e mengerechir el mo melasem ra rebebil el mo ouuchel a kngterir er a osisiu el omeruul! Ng diak el sebechem el kudmeklii. A Chedaol Reng a mo diak lobengkem ea tekoi a mo rongedii omerkollam sel bo molekoi. Ng diak el sebechemiu el merael ra lomekedong er ngii a Lehi el kmo “ngdiak de borngii el rael”⁵ e omdasou el kmo ngsebechem el omekrael ra rebebil el mora “mele malt e ibutek”⁶ ---ng diak el sebechel meruul.

Ng di ngarngii a nger el mor tial omelasem elekor kau e tia kmal di osisiu el mor ngkel

osiik a klemerang el kau a morngii. Kau el kmo ke techang el ngii di el ngerang el blam relii, kau a sebechem el nguu a klausubes. Kemi el bek el mekekerei el sechal a sebechemiu el chemoit el momedechel aikal kngtmiu el bom charm er ngii. Tiang a “ongasireng ra klausubes,” ng ongasireng er a Tngakireng ra Jesus Kristo. Eng di ngdiak el sebechem el rulii alsekum eng diak el blak a rengum ra ebangelio, e diak el sebechem el rulii alsekum ng diak lobengkel a ouuchel reng. Me kulengit er kemi a remekekerei el sechal me bom mesisiich e bom klikiid. Alsekum eng kirel, e a kulengit me *bo* mesisiich e bom klikiid.

Rodam, aki mengedecheduch er kemi el di bleketakl ele a ngiidi el ngerang el diak el siich a diak el oureor. Aki mengedecheduch el bleketakl ele Diablong a meral ngar el ruul el melemall er kau e kau a chelbangel a klisichel omkekerei. Ma ki orkedii a cheri ra biliu e oldiu el sisichemam el mor aikel ki meduch er ngii:

Hark! ngerel a mekemad el dorrenge er ngii el klou e mechellins;
Mei me mobengterir! Mei me mobengterir!⁷

Kemi el mekekerei el sechelik, ke dousbech ra rebetok ra rteruich el telael el misionari er a buil ma rak el merael mei. Ng kmal kirir el mengai ra klou el basent ra Aaronic Priesthood el tir a mo moterkokl, mesisiich, klikiid, el mo mesiou.

E mortirke tir a mla mesiou malechub ete mesiou er chelechang, aki oureng a sulii ra klungiaol el bla mruul, ma klengar el bla mrutech. Klengeltengat lekor kau! Aki dirrek el medengei el kmo te ngarngii a sorir ra chesel a klengar re tir el mora mision, eng di secher malechub eng kmo ngerang el merrob er tir, meng diak el sebecherir el mong. Aki chemolt el osus er kemi el rokui. Aki medengei aikal somiu, e oyeng er tial soal a rengmiu. Aki ou beltikereng e chemat er kemi. Kemi a “ngara chelechad” e di merkol ngar tial chelechad, engdi ngdiak bo mosiou e le kom mla tuobed loku a chetengakl. Eng di kemi el bebil aki ousbech er kemi el rokui!

Elechang, e kemi el odam ra Melchizedek Priesthood. Ng diakom klikm e dengchokl el lungil besmiu. Ng dirkak bok merek. Ke dousbech ra rebetok el telael obekel el mora mision ra Ikelesia. A rebek el mision president a olengit er tir. A bek el basio losiou, a robekel a meskid sel keloulechad er a ureor el diak a rteruich a rekrir, altang e te kmal meduch, el sebcherir el remuul.

A mo oldubech ra robekel el mo mesiou, a First Presidency ma Chelechad ra Teruich ma Terung a mla rulii a tara kot el bekururau el omeruul el mla meues ra urerel a remisionari er aikal mla mo merek el okeim el rak. Sera Ongeim el buil er chelechal rak ea roungerachel er a priesthood el ngara ureor a ngiluu a uleklatk el kmo a cheral a blirir a robekel (aki di mesaod ra cheral a blai) a bol olengeseu er ngii a udoud er a misionari ra

Ikelesia alsekum a cheral a mo klou er sel telkael er a bek el buil. Ng meral klou el klengetengat! Tiang a mlo durokl ra babeluades el ngesou el kirir sel di chimol kot el klou el itel a udoud a robekel a elbangel sel ngara mision. A Rodam a dirrek el mla oterkeklii el kmo a mision ra robekel a sebechel el mo ngara elolem el mo teruich ma erul buil, ma dirrek el sel dimla ngarngii el teruich ma eai el mo luich ma euang. A dirrek el tara kmal lungil el mla mekedmokl el oldubech er tial tekoi, a robekel a sebechir, el chemoit a di ududir ra bedengir, e mermei el di telkib el taem a le ngarngii a metacherebesul el tekoi ra telungalek. Me merkong e lak dim simbai el kmo komo melengod a chesimer e di mochosisiu a temiu kemiu metirkal teruich ma etiu a rekrir! Ng diak bo kulekoi er kemiu me bomoruul aikang eng di ngarngii a betok el bebil ra tekoi el sebechemiu el remuul, el obengkel a klou el ilmokl eng sebechemiu el remuul.

Rodam, kirel a klisichel a bedenged, telungalek, ng tekingel a udoud, ea ki medengei el kmo a bebil er *kemiu* a locha diak el sebecherir el mong er chelechang malechub a ngar medad. Engdi ngokiu a mekekerei el uldasou ea betok er kemiu a sebechir.

Rebishop ma re stake president, bo mosaod er tial ulsbechall er a council ma ongidbel er kemiu. Bom dengchokl er medal a miting e bom ngara nglunguuch lomes el mor tial ongidibel el kirel tirkel sebecherir e kirir el nguu tial okedong. E mongedecheduch lobengterir e bom ngesuterir el sikii a sils el mo mesiou. Rodam, tiang sel ledubech, em du ra rebechemiu el kmo alsekum meng sebecherir el mechei a ungil kingellir ma remote ra tv el kmal di mekesai el buil, eng sebecherir el mechititerir a rengelekir a rengelekir. Tirkal mekekerei lungil ngalek a kmal diak el mekesakl, eak yaksok er kau el kmo kau a mo meruul a tekoi el kirir el ngara omesiou er a Rubak el, beluulechad el diak a ulebengelel, el kau a mo diak el sebechem el remuul alsekum me kedikiei ra blim e di mengetab er tir. Ngera ungil sengk ra rederir ar delad mar rdemerir ar demad a lebestierir a merael mei el telcheroll el melekoi lokiu a omeruul ma cheldecheduch el, “Ngar tial telungalek eaki mora mision!”

A ureor ra misionari a diak el dil chimol tekoi el doruul er ngii er a chelsel tial klou, lungil Ikelesia. Engdi omesingd el dousbech el meruul a di mo ngara rechad el ma kot el remenges a ebangelio ra Jesus Kristo e mo ngara klaumerang. E tiang a uchul me sel mong me ngulebongel ngerachel el Jesus a milsterir a re Teruich ma Terung sel kot el klou a ultutelel---el “mora el mong, e molisechakl ra rokui el beluu, omesterir a techolbe chelid loba ngklel a Edam, ma Ngalek, ma Chedaol Reng,”⁸ E seikid, ng kmal di seikid, eng mo sebechel a klengeltengat er a ebangelio el mei---kltalreng ra telungalek, prokuram ra rengeasek, yaksok ra priesthood, ma ruoll el ngara templo. Engdi ua Nephi er a louchais a klemerang, ngdiak a dichimong ra ikal tekoi el mei dil merko chimong a “[blal] siseb ra chelsel . . . a rael.”⁹ Meng okiu aikal rokui el bo doruul ra rael el mora diak a ulebengelel, ekede ousbech er a rebetok el misionari el mekengii tial rael e olengeseu ra rebebil el mo choeak ngii.

Ngara rokui el chad, kekerei ma klou, el urrekodel ra priesthood, a kulengit ra mesisiich ma blak el reng el ngor, el ngor el diak el dil mesisiich el omtok a mekngit mengkel ngii a outekoi a mekngit, e bai ngor el kirel a ungil, ngor ra evangkelio, ngor el kirel a Dios. Rodam ra rokui el rak, mnguu a semesemel uram e momes aikel omdung el mo oureor ongasireng ra klengar er tirkel “tir a diak lodengei a klemerang eleng diak lodengei el kmo temo metik er ngii er ker.”¹⁰

*Mereched el mo ra mekemad, mereched el mora ked;
Klemerang a ulkungam, e mengkerngam.
Dechor el kirel a banderang; mesebesek er bab!
Aki mui ra deureng, deureng el merael mora rekeblimam.* ¹¹

Loba ngklel a Jesus Kristo, el Mastang er kid, amen.

Uleklatk

1. Joseph Smith---History 1:15.
2. “We Are All Enlisted,” *Hymns*, number 250.
3. Mesa Doctrine and Covenants 84:44; dirrek el mesa Deuteronomy 8:3; Mateus 4:4.
4. *Lectures on Faith* (1985), 74.
5. 1 Nephi 8:28.
6. 2 Nephi 31:18.
7. *Chelitakl*, number 250.
8. Mateus 28:19.
9. 2 Nephi 33:9.
10. Mesa Doctrine and Covenants 123:12.
11. *Chelitakl*, number 250.

Omesiou el Ngar Sel Teletelel er a Rubak

Mlara President Dieter F. Uchtdorf

Ongerung el Counselor er a First Presidency

Okolem ma eim el rak ra memong, ruriul ra bol merek Ongerung el Mekemad, eng mle ketengek el mesang a klengeltengat ra welfare prokuram ra Ikelesia. Mak mle kekerei el ngalk, eng di ak dirk medengeli a telemtemul a momo lobengkel a selengoes el wheat ma ikel bail el mlodurokl ra rechad ra Ikelesia el ngara beluu ra Merikel el mora Resanto el nga ra Dois. Ak melemolem el melatk aikal ungil omeruul ra beltik el reng el mei er kemam el mlara chelebuul.

Tial teleteael lobengkel chelchal mong me ngokeuid ma eim el rak ra prokuram ra welfare a uchul eak mo melbedebek aikel betengel osisechakl el kirel a ulekerreu el mora remechebuul el mo sebecherir el di tir, e mesiou ra rebebil.

Ngara Risel a Klaumerang er Kid

Bebil ra taem e ked omdasou ra welfare el di tara osisechakl ra ebangkelio---el tara rechelel a kerrekerul ebangkelio. Eng di ngak oumerang el kmo chesel sel uldesuel a Rubak, ea blak el reng er kid er tial osisechakl a kirel medalm ra risel a klaumerang er kid ma blak el reng er kid el mor Ngii.

Ngulemuchel ra uchelel a taem, ea Rubak a milketeklii tial suobel: lobengkel ongit, el kmul kmo alsekum eng betik a rengum er Ngii e mletketerir a remechebuul, e ngosuterir, el mo oltirakl ra llechul kmo mngara omelatk el kirir a remechebuul ma resmecher ma re ngara ringel, ele ngkel diak loruul aikang a diak el oltirkal er Ngii,² ma mesisiich el uleklatk el kmo alsekum a chad a ngmai ikel rokui el Rubak a mla msang e diak lodersii el telkib er ngii, el oltirakl a llach ra ebangkelio, el mora remechebuul ma rekosekodel, eng mora beluu ra ngau el obengterir a remekngit, e mora ringel.³

A Siungel a Klechad ma Reng a Dmak el Teblong

Aikel erung el ngarbab el llach el---mo betik a rengud ra Dios ma tonari er kid---a uldekial a siungel a klechad ma reng. Ng klou a belkul bododengei el kmo aikal erung el llach okedongall el “ngarbab” ele bek el llach a ultuil er ngii.⁴ Ng belkul a kmo, a klechad er kid, telungalk, ma Ikelesia a omuchel ra ikaikid el erung el llach. A rokui el moktek a kirel omuchel ra ikaikid el erung el ngarbab el llach---ra beltkil a rengud el mora Dios ma tonari er kid.

El uaia udoud, a siungel a klechad ma reng a diak el kakeakel.

Ngkel Uchul a rokui el klengar a mla kmul kmo a rokui el tekoi a reng el mor Ngii,⁵ Tia belkul a kmo a “klengar ra reng a kot ra rokui el *klengar*. Ng diak di bododengeli e dosuub er ngii, ng kired el oltirakl er ngii.”⁶

Eng di, te ngarngii tirkel lengelakl osengir ra siungel a klechad ele te omdasou er ngii el diak el klou a belkul. Te blak a rengrir ra siungel a reng e mengkekerei ra siungel a klechad. Meng uaisei el klou a belkul el dengai a uldesued el kirel a tekoi ra babeluades, eng di kede mol mecheuid ra klou el belkul a klechelid alsekum eng diak dengar omesiou el mora rebebil.

Okesiul tiang, a Enoch a milkedecherur a Zion lokiu a siungel a reng el kildmekelterir a rechad el mo tang a rengrir ma uldesuir ma ureor ra siungel a klechad meng dimlak a chebuul er tir.⁷

Ng uaisei, ng sebeched el omes el bedul a cherrungel el okesiu, el Jesus Kristo, el doltirakl er ngii. El uaia osischeklel a President J. Reuben Clark el kmo, “A Osobel ra lemei ra beluulechad eng mle erung a meklou el urerel; a chimong a kudmeklii a urerel a Mesiah, sel tngakireng el mora rokui, ma kedmeklel a llach; ea chimong a urerel el ngii a riruul el mora rodam ma rodos ra tech lokiu a ngesou el kirel a ringel el tir a mlarngii.”⁸

Me ngosisiu el teletael, a okerulel chedaol klengar kid a diak el kakeakl ngii ma siungel a klechad el kirir a rebebil.

A tang obengkel chimong. Alsekum ea chimong a diak lobengkel a tang eng melemall ra uldesuel a Dios el kirel a deoueng.

Sel Teletelel aRubak

Te betook a rungil chad ma chelechad ra beluulechad el melsam el oreched a ngesou el mora remechebuul ra ngii dil ker. Ng dmeu a rengud el kirel tiang, eng di a teletelel a Rubak sel omekerreu ra remechebuul a ngodech ra teletelel a beluulechad. A Rubak a mla kmul kmo ng, “kirel mekedmokl el ngar sel teletelel er Ngak.”⁹ Ngii a diak dil semeriar el kirel orechudel el usbechelled; Ngii a simbai el kirel a diak a ulebengelel teleteled. Tiaikid a uchul, ea Rubak a blechoel uldimukl er ngii a di mo kid el mesiou er kid ma dirrek el tonari er kid luldimukl ra remechebuul.

Sera 1941 ea Gila River a tilchebii a beluu ra Duncan Valley ra Arizona. A ngeasek el merreder ra stake el Spencer W. Kimball a mlo kebetech ngii ma recounselor ngii, mlo medengeli a teletelel tial telemall, e suumech a tekoi el mora Salt Lake City lolengit ra kmal klou a iidisel udoud.

Ma uchei ra lodurokl a udoud, ea President Heber J. Grant a uldurukelterir a retedei el chad: Henry D. Moyle, Marion G. Romney, ma Harold B. Lee el mong. Te mlo kebetech tir ma President Kimball e ulsischeklii ra klou a belkul el suobel: “Tiang a diak el prokuram ra ‘beskak,” tir a dilung. “Tiang a prokuram ra ‘di-kid el ngosukid.’”

Betok el rak ruriul, ea President Kimball a dulang el kmo: “Ng locha mle beot el tekoi, a kumdasou, el tirkal Odam a dil bilskemam a [udoud] e locha dimlak el sal meringel a ki bom dengchokl e ki bingii; eng di ngerang el klungiaol a dilubech ra kim derdart el chad ra ikelesia el mlora Duncan e mekedechor a kakine e mesib a chutem e remuul aikel rokui el mle kirel meruul. Tiaikid a di kid el ngosukid.”¹⁰

Ma otireklir ra teletael ra Rubak, e tirkal chedal a stake ra President Kimball a dimlak di lekedmokl orechudel el ngesou, te dirrek el dilemmii omesiungir, ngilsuterir a rengara ringel, e mlukeroul ra beltik el reng ma kltalreng ra losiou ra tang ma tang.

Kid el Rokui a Ulecherangel

Chelechal taem ete betook el chedal a Ikelesia a ngara ringel. Te songerenger, kosekodel ra udoud, e ngara ringel ra betook el teletael ra bedenged, reng, ma ringelex chedaol tekoi. Te meringel el ngara nglunguuch el kirel a ngesou el ousbech.

Rodam, lak momdasou el kmo tiang a ngerchelel a kmong techang. Ngurerek, e urerem. Kid el rokui a ulecherangel. “Rokui” a belkul a kmo *rokui*--bek el obang a Priesthood ra Aaron ma Melchizedek, remesiich ma remechebuul, ra bek el beluu. Chelsel a uldesuel a Rubak, e ngarngii a kmo ngerang el bek el chad a sebecherir el odersii.¹¹

A suobel el desuuebii ra bek el telcheroll a kmo a remesiich ma remechebuul a *rokui* el ngara cheungel osisiu el chedaol ngerachel el olngeseu ra retonari er tir. Ng kid el rokui el mo dmak el oureor lotireklii a ungil osischeklel a welfare ma siunged ra klechad.

Kede blechoel mes a usbechall el iuuekl er kid e oureng ma kmong techang el ngar cheroid dil kiul dum el kedmokl aikaikid el usbechall. Kede locha mengiil ra semmong el chad el mui ra llomes el mei sumechokl a mondai. Sel bo deuaisei, e kede tomer ra tonari er kid ra ngesou el sebeched el msang, e tomer ra techelled el mesiou. Meng uaisei el diak le mekngit a resemmong el chad, eng di a mera er ngii: ng diak el klebech a iidisir el sumechokl a rokui el mondai. Ng bai, Rubak a mla ngoiteterir a repriesthood er Ngii ma chelehad el ngara beluulehad el ngosukid. E sel, kmal ngar bitar ngii, e Ngii a mla meskid a chelehad ra Relief Society. Me kid el obang a priesthood a medengei, ng diak a teletael ra welfare el ngoriakl alsekum eng diak dousbech ra chetengakl el sengk ma duch ra rodos.

A teletelel a Rubak a diak de dengchokl e dongiil ra mondai el lengelakl rucheil ra dolngeseu. Ng mengdibel er kid, iimuil chimal a biled, e mo oureor, e mekedechor a did malechub a bilas el ngoikid el mo iimuul ra ringel. Rengeasek el sechal ra Zion, kemiu lobang a priesthood, a kiriu el mengeteklel a ngesou el mora Resanto el oltirakl aikel ulekrael el osisechakl ra prokuram ra welfare! Ngercheliu el mok a medemiu, ousbech ra priesthood el mobang, e mo oureor el ngar sel teletelel a Rubak.

Kot el Ngarbab el Chelechad ra Beluulechad.

Sera taem ra Klou el Chelebuul ra Kerrul, ea Harold B. Lee a lulengit er ngii a Rodam el mo osiik a ngesou el kirir a re mle kosiki, ngara klengit el reng, ma sengerenger ra kakerous el beluu ra beluulechad. Ng mle meringel losiik ra nger e ngiluu tial teletael el mora Rubak e uleker, “Ngera el chelechad a kiram el kudmeklii ... el kirel tiang?”

Meng “ng kmal di ngii ma ledung [er ngii] a Rubak: ‘Momes, e rungalk. Ng diak mousbech ra ngii dil chelechad. Ak mla meskemiu a kot el ngarbab el chelechad ra beluulechad. Ng diak a lmuut el ngarbab ra chelechad ra priesthood. A ngerachel el kiriu el kudmeklii a kirir a priesthood el mo oureor. Tiaikid e merekong.’”¹²

Tiaikid a uchelel chelechal taem el dirrek. Kid obang a chelechad ra Rubak. A ngercheled a kmo ng mekerang a dousbech er ngii.

Ng kired el omuchel el mo medengei el kmo ngerang a bla locholt a Rubak. Ng diak el kired el omdasou el kmo kede medengei. Ng kired el obengeli tial teletael lobang a ngariou el reng el uaia ngalk. A bek el telcheroll a kirel suuebii a dodai ra osisheklel a teletelel a Rubak sel omekerreu ra remechebuul. El uaia rebetok el profet el mla olisechakl er kid ra betok el rak, a osisecheklel a welfare ra Ikelesia a diak di lungil uldasou; aikang a mla mocholt el klemerang ra Dios---aikang a Teletelel sel lolngeseu ra remechebuul.

Rodam, a kot e msuub a mla mocholt el osisechakl ma ruoll. Monguii ra babier el kirel a welfare ra Ikelesia;¹³ e dirrek el bo multuil ra Internet website el “providentliving.org”; e mluut el menguii ra Ongelolem el buil 2011 *Liahona/Ensign* ra Ikelesia el kirel a teletelel a welfare. Mosiik a teletelel a Rubak sel omekerreu ra Resanto er Ngii. Msueebii el kmo ng mekerang osisechakl el kirel olngeseu ra remechebuul, omesiou el mora tonari, ma siungel a klechad a le kaketkaki. A teletelel a Rubak el kirel a siungel a klechad a uldimukl er ngii a tabesul teletael ra klengar, luldikuml a skuul, ulekerreuil a bedenged, ureor, orretel a udoud ra telungalk, ma klisichel chedaol tekoi. Bo modengei a beches el teletelel a prokuram ra welfare ra Ikelesia.¹⁴

Sel bla msuub a ruoll ma osisechakl ra welfare ra Ikelesia, e bo moruul aikel blam suub el olngeseu er tirkel tir a ngerchelem. A belkul tiang a kmo, oumesingd er ngii, ng kirem

el di kau el omdasou er ngii. A bek el telungalk, bek el cheldebechel, bek el basio ra beluulechad a kakerous. Ng diak a kmal di chimong el meral teletelel a welfare ra Ikelesia.

Ng kirem el kudmeklii a teletael el oltirakl osischeklel a Rubak el ngii a chatter ra teletael ra basio el mngarngii. Ma otutel a teletael ra welfare, a diak el belkul a kmo ng kirem el blechoel loltirakl ra rengara Salt Lake City. Ng bai kirem elomes ra babier, a rengum, ma babeluades. Moumerang ra reng ra Rubak e moltirakler a Teletelel.

Ng kirem el oltirkal aikel rechedal a Kristo a miruul ra bek el taem: bom dak el chadecheduch, mousbech aikel rokui el ngarngii, mosiik a ulekrael ra Chedaol Reng, molengit ra uldesuel a Rubak, e miuiil chimal a bilem e bo moureor.

Ak meskemiu a yaksok, alsekum e ko moltirakl er tiaikid el teletael, e ko mo ngmai a ulekrael el kirel a *techang, ngerang, oingerang, e ker* sel mosiou el ngar sel teletelel a Rubak.

Klengeltengat ra Omesiou el ngar sel Teletelel a Rubak

A telbiil el ulaoch ma klengeltengat ra welfare ra Ikelesia, el olngeseu er sel teletelel a Rubak, a bebil ra kmal meklou a belkul e klebokel el Rubak a mla mesterir a Rengelekel: “Alsekum e kodersii a rengum el mora songerenger, e smisichii a ngara ringel; ea llomes el mobang a mocholt, ea iilkolk a mo uaia sueleb a sils: Ea Rubak a mo melemolem lomekrael er kau.”¹⁵

Ma de meteet ma de chebuul, el diak el iior ra basio el de kiei er ngii, e kid el rokui el ousbech ra tang ma tang, le sel dechoit a temed, dechad, ma ikel ngarngii er kid ea reng er kid a mukeroul e mo klikiid.

Tial ureor ra ngesou er sel teletelel a Rubak a diak el kuk di tara tekoi el llechukl ra prokuram ra Ikelesia. Ng diak el sebeched el choitii malechub e docheueklii. Ng moktek ra osischekled; ng telengtengil a klechelid er kid. Rodam, ng klou el techelled kid lobang a priesthood el nguu a priesthood el mo oureor. Ng diak el kired el cheklii a rengud malechub a uldesued el kirel a mo di kid el mesiou er kid, ungil omekerreu ra remechebuul, e ngara klechubechub el omesiou.

A tekoi ra klechad a ulech ra chedaol tekoi. A Dios a mla meskid tial klechad ma dirrek el ringel ra klechad lobengkel el sebeched el mukeroul el mor sel ngii a klechad el Chedam ra Babeluades a soal. Mei e bo dodengeliu a klou el ngerachel ma klengeltengat el mei sel doltirakl ra teletael ra olngeseu er sel teletelel a Rubak a nglunguchek el ngara ngklel a Jesus Kristo, amen.

Uleklatk

1. Mesa Doctrine and Covenants 42:29--30.
2. Mesa Doctrine and Covenants 52:40.
3. Mesa Doctrine and Covenants 104:18.
4. Mesa Mateus 22:36--40.
5. Mesa Doctrine and Covenants 29:34
6. Thomas Merton, *Thoughts in Solitude* (1956), 37.
7. Mesa Moses 7:18.
8. J. Reuben Clark Jr., ra Conference Report, Apr. 1937, 22.
9. Mesa Doctrine and Covenants 104:16; dirrek el mesa 15.
10. Spencer W. Kimball, ra Conference Report, Apr. 1974, 183, 184.
11. Mesa Mosiah 4:26; 18:27.
12. Harold B. Lee, cheldechedechal mildung ra welfare agricultural meeting, Oct. 3, 1970.
13. Mesa *Handbook 1: Stake Presidents and Bishops* (2010), chapter 5, “Administering Church Welfare”; *Handbook 2: Administering the Church* (2010), chapter 6, “Welfare Principles and Leadership”; *Providing in the Lord’s Way: Summary of a Leader’s Guide to Welfare* (pamphlet, 2009).
14. Elder Glen L. Rudd’s ra babier el *Pure Religion: The Story of Church Welfare since 1930* (sebechel mengai ra Ikelesia) kmal ungil dosuub er ngii el kirel a reksi ra prokuram ra welfare ra Ikelesia.
15. Isaia 58:10--11; dirrek el mes a bades 7--9.

Omengedmokl er a Priesthood: "A Kusbech a Ngesou er Kau"

Mlara President Henry B. Eyring

Kot el Counselor ra First Presidency

Rodam er ngak, ng dmeu a renguk el obengkemiu er tial klou el miting ra robang a priesthood ra Dios. Chelechal kesus eak mo mengedecheduch el kirel a kedmeklel a priesthood, ra kedmekled ma ikel dodars el mora rebebil.

Betok er kid a locha mo melbedebek, "Ngak ak kldmokl el kirel tial ngerachel ra priesthood?" A nger ngak a "Oi, kom dimla kldmokl." A moktek er ngak er chelechal sils a ngosukemiu el mo medengeli tial kedmekliu e mo mesisiich a rengmiu el kirel.

Ko medengei el kmo, a Aaronic Priesthood a uaia luchelel a kedmeklel a priesthood. Betok er tir a ngeasek el deacons, resensei, ma repriest el teruich ma erung el mora teruich ma etui a rekrir.

Kede locha mo omdasou el kmo a kedmeklel a priesthood a duubech sel de bocha ra rekil obang a Aaronic Priesthood. Eng di a Demad ra Babeluades a dimla mengedmokl er kid ra dengara Rengedel ruchei ra demechell. Ngii a mengedmokl er kid er chelechal kesus. E Ngii a melemolem el mengedmokl er kid er sel ungil er Ngii.

A moktek ra rokui el kedmeklel a priesthood, ra klengar ruchei ma chelechal klengar, a kudmeklid el kirir tirkel bo dosiou er tir el mor Ngii el kirel a diak a ulebengelel klengar. A bebil ra kot el suobel er sel klengar ruchei ra cheroll a uldimukl er ngii a uldasou el kirel a diak a ulebengelel klengar lobengkel a Jesus Kristo el Tngakireng er Ngii a moktek er tial uldasou. Ng dimlak di demosisechakl er tial uldasou kede dirrek el mlo kldibel e melilt.

Meng sel kateng el uchul e kede obes sel demechell, eng kired el osiik ra rael e kede lmuut el suub aikel ngii a ble dodengei e mesebechakl. A tebedechel tial kedmekled a kired el osiik aikel mekreos el klemerang e mo sebeched el soiseb ra telbiil el mo oltirakl. Tia ousbech ra klaumerang, klengariou el reng, ma blak el reng er kid ma dirrek el ngesou ra rechad el mla metik ra klemerang e ouchais er ngii lobengked.

Te locha chedam ma chedil, remisionari, malechub a resechelei. Tial ngesou a tebedechel a kedmekled. A kedmekled ra priesthood a blechoel uldimukl er ngii tirkel mla mekedmokl el meskid a techall el kongei ra ebangkelio e melilt el mo oltirakl a telbiil el mo uchul eng medalm ra chelsel a rengud. Ma mo uchul e kede mo nguu a diak a ulebengelel klengar, ea omsiou er kid er tial klengar a uldimukl a ureor loba rokir el

rengud, uldesued, ma klisiched e melasm el mangedmokl ra rebebil el muut el mora Dios lobengked.

Ma tebedechel a kedmeklel a priesthood el denguu er tial klengar a techall el mesiou e olisechakl ra rebebil. Ng locha uldimukl er ngii a sensei ra Ikelesia, remellomes ma rungil chedam, chedal a quorum, ma remisionari ra Rubak. A Rubak a mo ocholt a techall, eng di a kedmekled a di mo ultuil er kid. A moktek er ngak er chelechal kesus a mo kmung a bebil ra meklou a belkul kedmeklel a priesthood el ngosukid el ngoriakl.

A ungil omelelilt ra chad el olisechakl ma chad el mesuub a di iior ra klemedengei el kmo ng mekerang a Rubak a longedmokl ra remesiungel lobang a priesthood er Ngii.

A kot, Ngii omekedong ra rechad, ngeasek ma remeklou, el omes er tir a rechad, luldikuml er tir, ete mechitechut e di hutsu el chad. A Rubak a sebechel mult aikaikid el chelitechut el mo klisiich. Sel bo dodengeli tiang e ngodechii osengel a chad el oungerachel er tirkel lolit el mo olisechakl er tir. E dirrek el sebechel ngodechii a teletael ra osisechakl el chad lobang a priesthood ousbech er ngii.

Mei e domes a bebil ra okesiu. Ng dimlak meduch el priest ra chelsel a klou el ward. A bisop er ngak a ulemekedong er ngak ra dengua ra tal iieta sils ra Sandei. Tia ra kunger, eng dilu el kmo, “Ngarnyii a temem el obengkek? A kusbech a ngesou er kau.” Ng dilu kmo ng soal a kubengkel el mo oldingel ra redil el dimlak kudengeli eng ding ulusbech a kall e dirrek el kirel mesuub el mo meduch ra iitel a udoud.

Ak medengei el kmo ngarnyii a reterung el kmal meduch el counselor ngii. Te mle meklou el chad e betook a lodengei. A tang ra counselor a mle klou a siobai er ngii el uriul taem eng mlo merredel ra mision e dirrek el General Authority. Ngikal tang ra counselor a mle chad ra llach el betook a remedenglii.

Ak mle beches el mokedong ra bisop el mo olngeseu ra chelehad ra priest. Ng mle medengei el kmo ng dimlak a kmal ngera el kudengei el kirel a osisechakl ra welfare. Ng dirrek el dimlak sal medengei a teletelel a ungil iitel a udoud. Ng dirkak a tal kuluches a check, malechub el ngarnyii a bangkebuk er ngak, malechub e bla kisang a llechukl el teletelel orretel a udoud. Eng di, ng diak el iior ra telitur ngak, ak mlo medengei el kmo ng meral mlarnyii ra rengul ra ledul kmo, “A kusbech a ngesou er kau.”

Ak mla mo medengeli a belkul a ulekrael el tekingel ngikal bisop. Ng milsang a ungil techall el kudmeklii obang a priesthood el mlo uchul eng milsang a telbiil. Ak ungil medengei el kmo ng dimlak lesang ngikal diak a ngera lodengei el buik el kmo a tar a klebesei eng mo chedal a Presiding Bishopric. Eng di tiaikid el sils, ma ikel sils ruriul ma rak el kudengeli, eng ulmes er ngak, el uaia kmo ngerang el mui ra meklou el yaksok.

Ng uايا blel semeriar ngii, eng di tiang a mle ureor ra rengul. A luut er kemam el mo remei ruriul ra odingel el mor ngikal redil, eng mle stob ra mlai. Ngultebedii tial obero ad el babilengel ra chedaol llechukl. E silmecheklak. Ng dilu er ngak el kmo ng betook a kirek el mesuub. Eng di ng locha milsekak el mechitechut e beot el mosisechakl. Mel muut er chelechal sils eak dirk medengei osishekkel. E sel kmal klou a belkul ak dirk medengeli sel klaumerang er ngii er ngak el kmo ng sebechek el mesuub el mo meduch--
- e mo ungil.

Ngii a ulemes el chengelakl er sel di klechad er ngak e milsang a techall el ngar medal a chad el omelchesiu er ngii el mechitechut e di hutsu e soal a ngesou ra Rubak e oumerang el kmo ng mo ngmai.

A rebisop, merredel a mision, ma rechedam a sebecherir el mo omes aikaikid el techall. Ak dirk milsang ra olchotel a klaumerang ra merredel ra chelehad ra deacon ra taem ra sengerenger. Ng mocha er sel temel el mo sensei meng mo diak el chedal tial chelehad.

Nguluchais loku a mesisiich el ngor el kirel a klungiaol ma klisiich el ngara rechedal a chelehad er ngii. Ng mle chemat omesiu er tir. E dilu el kmo ng medengei el sebechel ngosuterir a rebeches el deacon sel bo lomelchesiu er tir el mechitechut ele ngii el mla melchesuar osisiu el chelitechut er sera bel siseb ra priesthood.

A chelitechetul a rirelii el kmal mo klou a rengul, chubechub, meng sebechel melisiich e mesiu ra rebebil. Chelsel aikel erul rak eng kmal betook a blal bo lodengei e mellomes. Ng mla mo medengei el kmo ngilai a ngesou ra lorreder ra chelhad el teletael el dilubech el morngii ra ikal merekong el erul rak. Tial dilubech el morngii a osisiu el mei er kid sel sekum aikel dolbedebek a merael mo nguemed e kid a ngoriakl.

A Paulus a locha milsang tiaikid el kengaol teletael er a lollach er ngikel ngeasek el kldemel ra priesthood, el Timoti. Ng millisiich e olisechakl er ngii loku a kedmeklel ra priesthood e olngeseu ra Rubak el kudmekelterir a rebebil.

Paulus a dilu ra Timoti el kmo:

“Lak becherei a chad mel terkeklii a klengeasek er kau; e bai bo mokesiu el mora roumerang, ra omelekoi, cheldech duch, beltik el reng, ma reng, ma klaumerang, ma klikeid.

“Mol muut er sel kmei, e bol blak a rengum ra omenguii, orrimel, ma osisechakl.

“Lak mchitii a sengk el mobang, el mngiluu loku a ulaoch, loku omor ra chim...

“Bol blak a rengum el omtab er kau, ma dirrek el osisechakl; [1](#) e molemolem: ele sel moruul aikang eke olsobel er kau, me tirkel mo orrengees er kau.” [2](#)

A Paulus a milskid a ungil omellach el mei erkid el rokui. Lak el sebek a rengum ra telitur kau e bai momdasou el kmo ngera, lokuu a ngesou ra Dios, a sebechem el morngii.

A osischeklel a Paulus a orremelid el mo blak a rengud ra kedmekled ra priesthood ma tekingel a Kristo meng mo sebeched el mo nguu Chedaol Reng. Seikid e kid a mo medengei el kmo ngera el omesiou a soal a Rubak a bo doruul e mo sebeched el blak a rengud el kudmeklii, el diak el iior ra teletael el dengara chelsel ra tara klebesei.

Kid a mengedmokl el kirel omesiou ra priesthood el ngii a merael mo meringel sel lorael a taem el mong. A klisiched ma bedenged a mo mechtechut. Aikel techall el mesuub e dobedebek a bla dechuii a merael mo diak. Ma teletelel e kede mo ngara omesiou ra priesthood ea Rubak a mengerechir kid el mo mesisiich ra bek el sils ra klengar kid. Ng sebeched el mo kldmokl el kirel tial skeng lokuu okerulel a klaumerang er kid e ngara omesiou ra bek el sils.

A Rubak a mla meskid a techall el mengedmokl ra kmo ngerang el Ngii omekedong er ngii el yaksok ma telbiil el kirel mora re priesthood. [3](#)

Ng telbiil el bla desiseb er ngii lobengkel a Dios el mo oltirakl a rokiu el Llechul e mo ngara teletael ra omesiou el Ngii a soal omko Ngii a ngar tiang. Otireklel tial teletael a mekdebechii a chedaol klisiched el dousbech er ngii el outekangel el mora ulebongel.

A rungil lolisechakl ra priesthood a mla otii er ngak a teletelel tial klisiich. Ng kired el mekdebechii a kse el mo mesisiich ra ikel chelitechetud ma dekted el rullid meng soad el kimer. A rebetok el chedal a Rubak a mla otii er ngak a chedaol klisiich el mei lokuu a blak el reng el oureor el engelakl er sel ngii a bo lolengull er ngii a rebebil.

Kemiu a remesisiich el oungerachel ra priesthood el mla mekedecherur a mesisiich el klengeasek er kemiu a dirk obang el mol muut ra taem el mechudelang a bedengiu.

A ochellek a mlara kekerei el beluu ra Utah el kirel a tekoi ra siobai. Ng mlara hotel e nguu okedong. Ng mle osoi ruriul ra kmal mle mechesang el sils er ngikal ochellek e locha osisiu el mora President Spencer W. Kimball, el ulemuchel ra cheldechuduch el ua tiakid. Ng dilu el kmo, “Ak rirenges el kmo kemlei. Ak medengei el kmo ng mla mo osoi meke locha mechiuaiu..., eng ding sebechem el ngosukak? A kusbech er kau lobengkel el mo omais er tial beluu lomes a teletelel aikal blil ongdibel er kid.” Ngkal ochellek a ulebengkel er sel kesus, el diak a klemedengei er ngii ra okedmeklel aikal blil ongdibel

malechub e lodengei el kmo a President ngera meng meruul ra taem el sal skareter malechub e ngera meng ousbech a ngesou er ngii.

Betok el rak ruriul eak ngiluu osisiu el okedong ra kngara hoter ra beluu ra Siabal. Tiaikid el taem eak mle beches el Commissioner of Education ra Ikelesia. Ak mle medengei el kmo a President Gordon B. Hinckley a mlara osisiu el hoter el kuk mirruul a urerel ra Siabal. A kulenger ra dengua ruriul ra oleko ak mocha mechiuau, el kmal skareter ra betok el urerek el kulemdasou el kmo ngarngii a klisichek el remuul.

A President Hichkley a kmal mle ungil oto ra ngerel melekoi el kmo, “Ngera me ke mechiuau e ngak a ngar tiei el menguii aikal babier el kired lomes?” Ak di milkiis el tuobed el kmal ungil medengei el kmo a President Hinckley a kmal medeel el sebecel omes aikal babier e remuul ra bai lengak. Eng di ng rirelak el mo omelchesiu el kmo ngousbech a ngesou er ngak.

A President Thomas S. Monson ra ulebongel ra bek el miting eng blechoel loker ra melchesel a First Presidency el kmo, “Ngak ng kldmokl a urerek?” Eng blechoel el mo klikmechur sel sekum a nger a kmo: “Oi, e President, ng uaisei.” Sel klikm ra President Monson a ngarngii a belkul el mei er ngak. Ng rullak el mo omdasou el kmo, “Ngarngii a lmuut el sebechek el rullii ra chelsel aikel ngerchelek?” Seikid e ngak a lmuut el mora obis er ngak e oureor.

A rungil sensei a mla oti er ngak el kirel a kedmeklel otireklel a yaksok ma telbiil sel sekum a taem ma cheleuodel a rullii el mo meringel. Te mla oti e osisheklak el kirel a lmuut el blak el reng el oureor er chechal dirk mesisiich a bedengek.

Ng diak el sebechek el mo cherrungel el mesiou ra bek el taem, eng ding sebechek loba lmuut el blak el reng ra ikel kulemdasou. Tiaikid el kse el mlokdubech ruche, eak mo kldmokl ra ikel ringel ruriul. Kemi me ngak a sebechek el mo kldmokl loku a klisiich el mo oltirakl a yaksok ma telbiil loku a skeng el ngii a meral mei ruriul ra klengar.

Ak milsang olchotel tiang ra miting ra Church Board of Education. A President Spencer W. Kimball er tiaikid el taem a meketeketang el rak el ngara omesiu ea osisiu el taem eng mle betook a secherel a bedengel el di tal Job a sebechek medengei. Ngii a ulungerachel ra miting er tial tutau.

Ng dimle kiul, mo diak longedecheduch. Ng mlo ulekereuat ra kingellel. E blutek a medal. Ea btelul a tellatel. Ak dilengchokl er bitar ngii. Ea Elder Hollad a ngar bitang. Kemam el terung el milekiis el mo olngeseu er ngii. Ng dimlak ki modengei el kmo aki mekerang, ma ki mocha kiderii, el di dengchokl ra kingellel, el mora di kmeed el obis er ngii.

Ng mle sensei er kemam er tiaikid el taem el ngar ringel. Ma ki terung el mengider er tial kingellel, ea ki tobedang er tial delmerab el mlarngii a miting er ngii. Ng kora milok a medal, e dirk kora mengetelaol, e kmo, “Oh, bom kerekikl. Ng metemall a ulekiu.” Aki bocha mkeed ra obis er ngii, eng dulang el kmo, “Ak mlo mekngit el tirrebengii a miting.” Sesei el bung ruriul ra kim nguu el mora obis er ngii, e ngulemes er kemam e kmo, “Omomdasou eng diak el kiriu el lemuut el mora miting.”

Aki ulebult e orrechted el merael, el medengei el kmo ng klou a belkul ra Rubak el kim ngar tial miting. A President Kimball a dimle kekerei e meringel el ngara omesiou ma beltik el reng el mora Rubak. Ng mle kse er ngii el delalm ra rengul ra ikel taem lousbech er ngii. Ng mle kldmokl. Ng dirrek el mlo sebechel el osisceklemam e ochotii er kemam el kmo ng mekerang a doltirakl a yaksok ma telbiil, lokiu a mesisiich el kedmekled el ousbech aikel rokui el klisiched ra ikel domes eng kora mekekerei el ureor el kekerei klungiolel ruriul.

A nglunguchek a kmo bo doltirakl a telbiieled ra priesthood me bol sebeched el mo nguu a diak a ulebengelel klengar me tirkel rokui el mokedong el mo olisechakl. Ak yaksok er kemiu el kmo alsekum e ko mor sel tkul er bab el sebechemiu, ea Dios a oisois a klisichiu ma llemesiu. Ngii a mo kudmeklemiu.

A kuchais el kmo a Dios el Chedam a ngar e betik a rengul er kemiu. Ngii a medengelkemiu. Ngii ma mla Mekiis ra kodall el Ngelekel, el Jesus Kristo, a mlo duum ra diak a ngera lodengei el buik, el Joseph Smith. Tir a ulumerang er ngii el kirel Oluut ra cherrengel el ebangkelio ma meral Ikelesia. Tir a millisiich er ngii ra taem lousbech. Tir a ulebang a beltik el reng e sumeckeklii el lemuut el mo mesisiich. Tir a kildmeklii, e Tir a mengedmokl er kid, ra klisiich el oureor el kirel a klebkellel a celestial el ngii a moktek ra rokui el omesiou ra priesthood.

Ak meskemiu a klengeltengat me bol sebechemiu el mtab aikel klebokel el techall el Dios a mla meskemiu ra okedong ma kedmekliu el mo ngara omseiou el mor Ngii ma omesiou el mora rebebil. El ngara ngklel a oubeltik el reng el mengetekled e sensei, el Jesus Kristo, amen.

Uleklatk

1. Mesa 2 Nephi 32:3–6.
2. 1 Timoti 4:12–14, 16.
3. Mesa Doctrine and Covenants 84:39.

Duchelreng el Di Mo Ngak el Tang

Mlara President Thomas S. Monson

Rodam er ngak, ng klebokel el techall el kubengkemiu er chelechal kesus. Kid lobang a priesthood ra Dios a mekdebechii a mesisiich el deleuill ma klodam.

Kede menguiu ra Doctrine and Covenants, bliongel 121, bades 36, el kmo a llemelted lobang a priesthood a diak el kakeakl ngii ma klisiich ra babeluades (mesa Doctrine and Covenants 121:36). Ng klebokel el sengk a dobang---el urrekodel ra priesthood, el diak el kakeakl ngii ma klisiich ra babeluades (mesa Doctrine and Covenants 121:36). Ng uaisei, el tial mekreos el sengk, a diak di luldikuml er ngii a klengeltengat ng dirrek lobengkel a mesisiich el ngerachel. Ng kired el meruul a klengar me kede blechoel klikiid loba tial priesthood. Kid a kiei ra klengar el iiliuekl ra betook el olibesongel el sebechel mekrolid el mora tellemal. Ma mo uchul e kede mo cheroid er tial rael eng kirel mo blak a rengud e diak de medakt.

Ak dobedebekii a taem---ea bebil er kemiu er chelechal kesus a dirrek el uaisei---el llach loltirakl a betook el chad a mle osisiu ma llechud. Tia mla mo diak el klemerang. Ak dirk milenguiu ra *New York Times* el kirel omesuub el mlarnsii er sera summer ra 2008. A chetengakl el chad ra omesuub el kirel a deleuill ra rechad ra Notre Dame a kildmeklii a dmolech el cheldechoduch ra erul dart ma okedei el ngeasek el chad ra Beluu ra Merikel. A kumerang el kmo a mlo olchotel tial omesuub a locha osisiu ra betook el beluu ra beluuelchad.

A kuchais er kemiu a bebil ra chais ra chelsel tial babier:

“Ngkal chad el mengedecheduch a uleker a nger-ma-ker el ker el kirel a ungil ma mekngit, meringel el omelilt el kirel a ngarbab el llach ma moktek ra klengar. Me te melasm el oreched longer...eke mesterir tirkal ngeasek el chad el meringel el omdasou ra kmo ngerang el bol deli kirel aikal ker. Eng ding diak a kldmokl el omesodel malechub el bleketakl el tekoi el ousbech.

“A bocha lolengit er tir el mesaod a meringel el omelilt el tir a mla obangel, ea erung ra edei el tiud er tirkal ngeasek a mlo diak el sebecherir longer tial ker malechub el sodii a mondai el ngii a diak el ungil ra klechad, el uaia ng locha sebecherir el kiei a lengiil blai malechub e ngarngii a klebech el ududir el harau ra basio el borngii a mlirir.

Tial babier a melemolem el kmo:

“Sel bleketakl el uldasou lobang, el betook er tir a ulemelekl el melekoi er ngii a kmo, a omelilt ra klechad a di sel soal a chad. Ng di iior ra chad,’ tirkal chad a bleketakl el kmo. ‘Ng di iior ra chad. Ngak ak techang el mo melekoi el kirel?’

“Me te ouketui ra blekongesenges ra ngerachel, ete betook er tirkal ngeasek el chad a mla touchakl el kmal mor cheroid, [e kmo]: ‘Ak miruul aikel kulemdasou eng mo ungil a renguk malechub e sel soak el omelchesiu er ngii. Ng dimlak a ngodech el rael el kudengei el kmo ak mekerang ng kmal di sel kulmelchesiu er ngii.’”

Tirkal milngedmokl er tial omesuub a mlo meketeklii el kmo oumesingd er tirkal ngeasek el chad el lulngedcheduch er tir a “dirkak el ngai a klekedall el ousbech---lokiu a skuul,chelechad malechub el telungalk---el dolemii ra reng el kirel a meknngit ma ungil.”

[1](#)

Rodam, ng diak a ngar tiang lorrenses er ngak el ngarngii a rraureng er ngii el kirel a ungil ma meknngit, malechub el ngarngii a rrau a rengul el kirel aikel kired el meruul kid lobang a priesthood ra Dios. Kede mla mosisechakl e melemolem el mosisechakl ra llechul a Dios. Meng diak el iior ra omues ma omrenses ra ngii dil ker, ele aikal llach a diak el mengodech.

Me sel de kiei ra bek el sils, ea klaumerang er kid a diak lak lebora skeng. Kede locha mo metik er kid el iiliukel ra rebibil el teloi er tir e di kesai malechub eng di kid el tang el kirel aikel ungil ma diak lungil. Ngarngii a klisichel a rengud el mo mesisiich el dechor el kirel a klaumerang er kid, luldikum a di bol kid el tang? Me kid lobang a priesthood ra Dios, eng klou a belkul el bo dechebangel---loba duchelreng---ra chelsel a ngii dil teletael el dengarngii. Molbedebek aikel tekingel a Tennyson: “A klisichek a uaia klisichir a rteruich, ele renguk a klickiid.” [2](#)

Meng di merael mo chachisois, el bebil ra merael chisir el chad mar bebil---el kuk ngarngii a uchul er tir---a merael osengir ra buai, al bebil ra taem, e ngarngii a kse er tir el oltuub a klechelid, oumesingd a Ikelesia. Alsekum a klaumerang er kid a diak el delalm ra mesisiich el dodai, ea ikal otuub a sebecchel rullid el mo oumededenger ra klaumerang er kid malechub eng oitechetur a blak el reng er kid.

Sel ues ra kerrekarakl ra klengar el lilsang a Lehi, el debetik er ngii ra 1 Nephi 8, ea Lehi a mesterir, el teloi ra rebibil, tirkel mle urrekodel ra tekingel a Dios el mol muut ra taem el lengiluu a rdechel tial kerrekarakl ra klengar, el ngii a dodengelii el kmo ng olchotel a beltik el reng ra Dios. Eng di, ng meknngit a rengud, ele uriul ra lenguu tial rodech, ea rebibil a mlo merur ele sel klou el meteteu el blai a uchul,” el ngii olengchelel a klengarbab el reng ra rengelekel a chad, el oldars a chimorir el kirir e oltuub er tir; me te rirebet e remiid ra ngodech el rael. Ng meral mesisiich el dongu ra cherarou a otuub ma ulekakou!

Mak lmuut, e rodam, ngarngii a duchelreng er kid el mo mesisiich el dechor sel bo dechebangel a meringel el olibesongel?

A kumerang el kmo a kot el teletael dilubech el kirel a blakelreng ra klaumerang er ngak a dilubech ra kngara klsoldau ra United States Navy ra mocha ulebongel ra Ongerung el Mekemad.

Tial basio ra rebeches el soldau a dimlak el beot el teletael el mei er ngak, malechub a ngii dil chad el ultekangel el mora ulebongel. Aikel kot el edei el sandei eak mlo medengei el kmo a klengar ngak a ngara chelsel a kengaol. A navy dimlak lolasm el olisechakl er ngak; ng milasm el omekeuad er ngak.

Ng diak kubes ra bochal Sandei ra tal sandei ruriul. Aki ngilai a ungil klemechel ngkal ngarbab el merreder. Me tia ra kimsal melemalt el dechor er tial kim ngarngii e mesuub el mekelekolt cheltel tial beluu ra California, ea ki rirngesii a tekingel el kmo: “Chelechal sils ea rokui el chad a mora ikelesia---rokui el chad, a mong, eng di ngak a diak. Ngak a mo olengull!” E solang e oldiu, “Kemiu el Katolik a mora Camp Decatur--- e diak komei el mol muut ra edei el klok. Bo ruche, e morael!” Te mle betook el chad a merael. Eng kuk mocha oldiu ra ongerung, “Tirkel Jewish, a mora Camp Henry--- e diak komei el mol muut ra edei el klok. Bo ruche, e morael!” Mle telkib el kesai el chad a merael. Eng dula el kmo, “Kemiu el Berodestant, a mora auditorium ra Camp Farragut--- e diak komei el mol muut ra edei el klok. Bo ruche, e morael!”

Ak dim le mereched el mo omdasou el kmo, “Monson, kau a diak Mkatolik; ng diak kom Jew; e diak kom Berodestant. Kau a Mormon, me kedi dechor tiang!” A kuchais el kmo ak meral mlo omelchesiu er ngak el di ngak el tang. Ng mle meduch a renguk e blak a renguk, oi---eng ding di ngak el tang.

E mocha ketengek el remenges a meral klebokel el tekingel ngikal ngarbab el merreder. Ngulemes er ngak e okerei, “E kemiu ng mekerang a domekedong er kemiu?” Ng dimlak kudengei el kmo ngarngii a dilchor lobengkek er tial kim ngarngii e ngara omesuub. Meng uaia lekora dim le tang a ngeram el kmo, “Mormons!” Ng meringel el kusaod ra deuil a renguk ra kubult e kisterir a rebebil ra resoldau el dechor.

Ngkal merrder a kilkesur a bdelul e kora rrau a rengul e dula el kmo, “Mada, bo mosiik ra basio er kemiu. E diak komei el mol muut ra edei el klok. Bo ruche, e morael!”

Tia ra ki morael, eak mlo melbedebek a tekoi ra chelsel a cheldecheduch el ksilubii ra Primary ra betook el rak ruche:

Diak medakt el Mormon;

Diak medakt el di mo ngak el tang.

Diak medakt ra meisiich el blak el reng,

Diak medakt louchais er ngii.

Me tial teletael a uaia blo lengodech er sel kulemdasou er ngii, eng ding mle blak a renguk el di mo ngak el tang, omko ng mle kirel mo uaisei.

Me ngulemuchel er tiaikid el sils eng betook el taem el mlo diak a dechor rullek meng *di* mlo ngak el tang el dechor. Ng dmeu a renguk el kildmeklii ra uldesuek ra ngaramong el melemolem el mesisiich, el blechoel kldmokl el mengeluol ra klechelid er ngak, alsekum eng mo kirel.

Malsekum e ngarngii a taem e kede locha mo kora metitur ra ngercheled, e rodam, e msal e kuchais ra tekoi el mildung ra 1987 er sel taem eng Merreder ra Ikelesia a Ezra Taft Benson ra longedecheduch er mederir a rebetok el chedal a ikelesia ra California. Ng dilu el kmo: “Chelsel a rokui el taem, ea reprofet a mla omes aikel rak el merael mei er medad. Te billion el mla mad el chad me tirkel dirk mo mechell a omes er kid. Lak mecheuid er tiang---kemi u a tokubets el telcheroll. Meng kmeed el elolem el telael rak ea Dios a ulerreked er kemi u el kirel aikel ulebongel el klebesei ruche i ra ongerung el lemei a Rubak. A rebebil ra rechad a mo ruebet; eng di a rengedel a Dios a melemolem el mesisiich el mengiil ra luut ra merredelir---el Jesus Kristo. Meng uaisei el tial telcheroll a mo mengaisisiu er sel mekngit el taem ra Noah, el Rubak a milkbechesir a beluulechad loku i a ieleb, eng di ngarngii a klou el ngeldechel chelechal taem. A Dios a mla orrekedeterir a bebil ra kmal mesisiich el Ngelekel el kirel sel ulebongel el taem el tir a mo olngeseu el mesebechakl ra renged el mo mesisiich.” 3

Oi, e rodam, kid omtechei er tirkel bebil ra mesisiich el Ngelekel. Ngercheled el mo klikeid el kirel aikel rokiu el chetengakl el klengeltengat el Demad ra Babeluades a mla kudmokl el kired. Ngii dil ker el deborngii, ea priesthood el dobang obengked. Kid kede dechor ra chedaol basio? A kulengit, uchei ra mterkeklii a priesthood el mobang el mora basio malechub omeruul el ngii a diak lungil mei er kau malechub a priesthood el mobang, e bom chelellak e momtab a mo kngtil ruriul. A derstang er kid a mla nguu a Aaronic Priesthood. Chelsel a teletelel, ea derstang er kid a mla nguu a klisiich el ngii olab aikel kiis ra odngelir a reanghel. A President Gordon B. Hinckley a dilu el kmo:

“Ng diak el sebechem el mecherei a ngii dil ngerang me liang orars ra delongelem ma odngelir a reanghel.

“Ng diak el sebechem el meruul a ngii dil mekngit. Ng diak el sebechem el omulak. Ng diak el sebechem el omulak malechub e molekoi a blulak. Ng diak el sebechem el merrekakl ra ngklel a Dios malechub e mousbech a mekngit ea reanghel lodingel er kau e lobengkem.” 4

Alsekum ete ngarngii a mla ruebet ra klengit ra klengar tir, eng soak a bo modengei el diak a kermiu el kirel el kmo ngarngii a rolet eke lmuut el mei. Tial teletael okedongall el ouchel reng ra klengit. A Osobeled a milskid a klengar Ngii meng mo sebechem kau me ngak el nguu tial sengk. Meng uaisei el ouchel reng ra klengit a diak el beot el teletael, eng di a yaksok lobengkel a merang. Te mla kmo er kid, “A kngtim el kmal bekerekard a di mo becheleleu el uaia snow.” 5 “E ngak a diak luut el dobedebek.” 6

Te locha ngarngii er kemiu a kmo, “Ngak, a diak kultirakl a rokui el llach e diak kuruul aikel rokui el kirek el meruul, eng di a klengar ngak a kora kmal di ungil. Ng sebechek el ngara deourenge ra klengar e diak kultirakl a llach.” Rodam, ak subedemiu el kmo tiang a diak loureor el kamanget el taem.

Ng diak el betook el buil ra memong eak ngiluu a babilengel a chad el ulemdasou el kmo ng sebechel diak el oltirakl a llach e di ngmai a klengeltengat. Ng mla ouchel a rengul ra kngtil e sumecheklii a klengar ngii el oltiakl a llach ra ebangelio. Ng soak louchais ra tal bades er tial babilengel, ele ngochotii a klemerang el kirel a mekngit el uldasou: “Ak mla suubii ra (meringel el rolet) el kmo a Osobel a meral millekoi a klemerang el tekoi ra ledul kmo, ‘Ng diak a chad el mesiou ra reterung el mastang: el eng sebechel mo chetil a chimong, e soal a tang; maelchub eng mo urrekodel ra tang, e ouketuui ra chimong. Ng diak el sebechem el mesiou ra Rubak ma diableng.’ 7 Ak kmal mle, meringel el melasem, el mesiou el erung. A mlo ulebongel er ngii, eak mle bechachau, ngara iilkolk, e sabisi el Diableng a mesterir tirkel loumerang a chelbeldil, ma blulekngel ma telingolel.” 8

Me sel mo uchul e kede mo mesisiich el odngakl aikel rokui el mengurs er kid el mora chelbirukl el teletael malechub aikel rokui el ngor el mengesuseu er kid el mora ngodech el rael, eng kirel morngii sel di klaumerang er kid. Ma omteruich ma erung malechub a le dart ma teruich ma erung---malechub omngara delongelel--- eng sebechem el di kau el mo medengei el kmo a ebangelio ra Jesus Kristo a klemerang. Monguii ra Babier er a Mormon. Molbedebek osisechakl ra chesel. Moker ra Chedam el kirel a klemerang er ngii. Kid obang a yaksok el kmo “alsekum eng meral ngarngii ra rengud loker, loba blak el reng, ma klaumerang ra Kristo, e ngii a mo otii a klemerang er ngii el mei er kid, lokiu a klisichel Chedaol Reng.” 9

Sel bo dodengei el kmo a Babier er a Mormon a klemerang, e kede dirrek el mo medengei el kmo a Joseph Smith a meral profet el milsang a Dios el Diak a Ulebengelel Chedam ma Ngelekel, el Jesus Kristo. Kede dirrek el mo medengei el kmo a ebangelio a mla moluut er chelechal ruriul klebesei lokiu a Joseph Smith---luldimukl ra olutel a Aaronic ma Melchizedek Priesthood.

Sel blal borngii a klaumerang er kid, eng mla mo ngercheled, el ouchais er ngii el mora rebebil. Betok er kemiu e rodam a mla ngara omesiou el misionari ra beluulechad. Betok

er kemiu a rengeasek el sechal a dirk mora mision. Mkedmeklemiu er chelechang el kirel tial techall. Bom kerekikl el klikiid el mora omesiou.

Alsekum e kede kldmokl el mo omerk ra ebangkelio, e kede kldmokl el otireklii sel tekingel a Apostol Petrus, el kmo, “Bo blechoel kldmokl el mo onger ra rebek el chad el tir a mo oker el kirel a urunguliu.” 10

Chelsel a klengar kid eng morngii a techelled el mo ouchais el kirel a doumerang, el diak desal medengei el kmo ng oingerang e kede mo meruul er ngii. Tial techall a mlei er ngak ra 1957 ra kureor ra siobai el dung er ngak el mora Dallas, Texas, el bebil ra taem eng okedongall el “beluu ra ikelesia,” el mo mesaod el kirel a siobai ra chelsel a klou el ongdibel. Mocha ra ulebongel er tial ongdibel, eak ngilasech ra bas e merael lomes ra beluu. Sel ki mengelakl aikal kakerous el ikelesia, e ngikal omekall a kmul kmo, “A klitechetud e ko mesang a ikelesia ra Methodist,” malechub eng kmo “Ea kadikm a ikelesia a Katolik.”

Tia ra kimengelakl ra klebokel el bekerekard el sment el omekedecheraol el ngara bebul a rois, e ngikal omekall a kmo, “Tiaikid el omekedecheraol a lengarngii a re Mormons.” A tal redil el mla ruriul a uleker el kmo, “Ng sebechem, louchais er kemam el kirir a re Mormons?”

Ngikal omekall a mocha stob ra tkul a rael, e ulebult e dula el kmo, “Kel redil, a chimol tekoi el kudengelii el kirir a re Mormons a kmo te mo kebetech er tiaikid el bekerekard el sment el blai. Ngarngii a ngar tiang el medengei a kmo ngerang el kirir a re Mormons?”

Ak milengiil ra kmong techang longer. A kulemes a mederir a rechad el kmo ngarngii ak kora mo mtebengir, el soal mengedecheduch. Ak mocha medengei el kmo ng kmal di iior ngak er chelechang el otireklii sel tekingel a Apostol Paulus el kmo, bo “blechoel el kldmokl el onger ra rechad el tir oker kau el kirel a urungulem.” 11 Ak dirrek el mlo medengelii a klemerang ra chelsel a uodel el tekoi el kmo, “Sel taem el lemei techall el melilt, ea temel a kedmeklem a mla chengelakl.”

Meng teruich ma eim el bung, el mlarngii a techellek el ouchais er tirkal mlara bas a klaumerang er ngak ra Ikelesia ma ikel doumerang. Ng mle dmeu a renguk el kirel a klaumerang er ngak e dmeu a renguk el mle kldmokl louchais er ngii.

Meng ngara renguk e nglunguchek ma bek el chad el obang a priesthood bo longull er tial priesthood e bo loltirakl er sel klemerang el ngii a mlor tir. Mei ma derstang er kid lobang a priesthood ra Dios bo lodengei a loumerang. Mei e bol blak a rengud e de kldmokl el dechor el kirel sel doumerang er ngii, ea lskeum eng di mo kid el tang el dechor, e bo dobang a blak el reng, el mesisiich lokuu a klemedengei el kmo a merang er ngii a diak dil kid el tang sel de dechor lobengkel a Demad ra Babeluades.

Me sel dolatk el kirel a sengk el bla denguu el lemalt ra priesthood a diak el kakeakl ngii ma klisiich ra babeluades ea blak el reng er kid bol mengkerrengel e lomecheliu er ngii me bo de klickid el kirel aikel mesisiich el yaksok lobengkel. Mei e bo doltirakl a tekingel Osobel el mei er kid, el debetik ra chelsel a 3Nephi: “Modersii a olbtelem me bo lomekellomes el mora beluulechad. Kamosang Ngak a llomes el kiriu el oldars er ngii--- aikel bla mesekak el meruul.” [12](#)

Me bo de blechoel el oltirakl ra llomes e dodersii el morbab ma beluulechad lesang tiaikid a nglunguchek el ngara ngklel a Jesus Kristo, amen.

Ulekltak

1. David Brooks, “If It Feels Right . . .,” *New York Times*, Sept. 12, 2011.
2. Alfred, Lord Tennyson, “Sir Galahad,” stanza 1, lines 3--4.
3. Ezra Taft Benson, “In His Steps”(Church Educational System fireside, Feb. 8, 1987).
4. Gordon B. Hinckley, “Personal Worthiness to Exercise the Priesthood,” *Liahona*, July 2002, 59; *Ensign*, May 2002, 52.
5. Isaia 1:18.
6. Jeremiah 31:34.
7. Mateus 6:24.
8. Babier el melluches el mora President Thomas S. Monson.
9. Moroni 10:4.
10. 1 Petrus 3:15.
11. 3 Nephi 18:24.